

# Genevra fa visita a Puschlav

Per commemorar l'adesiun a la confederaziun (1815)

DA GUIU SOBIELA-CAANITZ

■ **Ils 19 da matg 1815 è Genevra vegnida il 22avel chantun svizzer. Il patg dals 20 da november ha stgaffi il corridor territorial da Bellevue tranter il giuven chantun ed il Vad, e quai grazia a la diplomazia dal Genevrin Charles Pictet de Rochemont (1755–1824).** Il

1816 ha il reginam da Sardegna-Piemunt cedì a Genevra territoris da 108,8 km<sup>2</sup> situads a sid dal lai e dal Rodan. Il 1819 ha papa Pius VII (Barnaba Chiaramonti, 1742–1823) gidà ad integrar las «communes réunies» catolicas a la Svizra: El las ha attribuidas a la diocesa da Losanna, e l'investg cumpetent ha survegnì il titel d'«évêque de Genève». Il 2010 dumbrava il chantun ina populaziun catolica da 37%, 35% persunas senza confessiun declarada, 12% persunas evangelicas e 16% d'autra appartegnentcha.

**Exposiziun ambulanta tras la Svizra**

Oz èn ils cuntrasts tranter linguas pli impurtants che quels tranter confessiuns. Quest onn commemorescha il chantun Genevra sia integraziun en la confederaziun. El ha organisà l'exposiziun ambulanta «Genève à la rencontre des Suisses» per sa preschentar sez, da Berna (20 d'avrigl) a Schaffusa (23 da matg), Cuira (6 da zercladur), Puschlav (ils 9) e Losanna (ils 25). Puschlav era pia la vischnanca orasum encunter l'ost en il viadi da l'exposiziun; cun ses 192 km<sup>2</sup> è Puschlav grond sco 2/3 dal chantun Genevra (282 km<sup>2</sup>). La «Tribune de Genève» ha publictà dus artitgels da l'istorica Joëlle Kuntz davart il Grischun. Lezza ha rapportà ils 7 da zercladur davart l'educaziun dal giuven Pictet en l'internet da Martin Planta da Susch (1727–1772) a Lantsch Sut, sco era davart la diplomazia da cuss. fed. Felix-Louis Calonder (1863–1952) da Trin che ha segirà la posiziun internaziunala da Genevra. Ils 9 da zercla-

dur ha Kuntz resumà l'istorgia religiosa da Puschlav, cunzunt la mazzacra da refurmadis il 1621. En il medem numer rapporta Arianna Nussio (Pro Grigioni italiano, Puschlav) davart la situaziun da la minoritad italoфона en il Grischun: «Nus stuain adina puspè far endament nossa existenza e cultura (...). La lingua uffiziala è il talian, ma ins montescha tavlas stradalas tudestgas [en nossas valladas] (...). Nus survegnin documents per tudestg perquai ch'ins manegia ch'in e scadin tar nus discurreia lez linguatg. Ubain ins cloma in'ambulanza, e la persuna che respunda na chapescha betg talian.» Tar las votaziuns dals 14 da zercladur ha il pievel grischun mussà sia solidaritad cun Genevra appruvond er el la midada da la lescha federala davart radio e televisiun, sco er, en il chantun, bleras vischnancas, t. a. Cuira, Glion, Puschlav euv. «oravontut grazia allas regiuns romontschas» (La Quotidiana dals 15 da zercladur, p. 2).